



Bentiaraq Ottosen

UPA 2026/147-1

Atassut

21. Maj 2026

Suliffeqarfimmik kisimiillutik ingerlatsillutik namminersorlutik inuussutissarsiuteqartut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunnit matusisinnaajunnaarsillugit Naartunermi, erninermi meeravissiartaarnermilu sulinngiffeqartarneq pillugu Inatsisartut inatsisaata allanngortinneqarnissaanut siunnersuusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Napaarteq Isak Petrussen, Demokraatit)

Atassut siunnersuummut tunngatillugu isumaqarpoq pingaaruteqartoq namminersorlutik inuussutissarsiuteqartut inuiaqatigiinni pitsaasunik sinaakkuteqarlutik atugassaartinnissaat. Atassutip politikkeqarpoq inuussutissarsiortut aammalu suliffeqarfinnik pilrsitsisut inuiaqatigiinni ineriartortitsinermit pingaarutilittut isigineqarnissaat. Taamaattumik suliffeqarfimmi kisimiilluni ingerlatsisoq meerartaarnermi suliffeqarfiutini matusinani imaluuniit ingerlatsineq unitsinngikkaluarlugu aningaasatigut tapersorsorneqarsinnaanera Atassutip eqqarsartariaasianut naleqquttoq oqariartuutigaarput.

Atassut isumaqarpoq namminersorlutik suliffeqarfiutillit ulluinnarni annertoorujussuarmik inuiaqatigiinni akisussaaffeqarput, suliffeqarfik nammineq ingerlakkaani aningaasarsiornikkut, sullissinermit aamma suliffeqarfiup ingerlaanarnissaanut akisussaaffik tamakkerluni pigineqartarpoq, tamanna sumiiffimmi kivitsisuusarpoq aningaasarsiornikkut. Taamaattumik meerartaarnermi sulinngiffeqartarneq nalaani suliffeqarfiit namminersortut ingerlaanarsinnaanerat periarfissaasaraluartoq sinaakkutit pitsaanerunissaat piviusorsiortuusoq isumaqarpugut. Siunnersuutip ajornartorsiutit tamanna annikillisarsinnaavaa, taamaalilluni inuussutissariortoq ilaqutariittut inissisimanera eqqarsaatigalugu periarfissat ajornaallisinnaallutik.

Atassutip ilaqutariinikkut politikkeqarneq nukittuumik inissisimanissaa pingaartilluinnarpaa, tamanna naleqquppoq oqaatigissallugu suliffeqarfiit namminersortut tapersorsorneqarsinnaasut ineriartortittuarnissaat. Kisianni periarfissat annertuut pigineqarput, sinaakkutilli ersarissarneqarnissaat pingaaruteqarpoq. Taamaattumik siunnersuut naligiinnerusumik aaqqissuussinissamik siunertaqarnera pingaartuuvoq.

Aammattaaq Atassut inuussutissarsiornikkut ineriartortitsinermit pitsaasunik sinaakkuteqartoqarnissaa pingaaruteqartuutippaa. Suliffeqarfiit mikinerit aammalu ataasiakkaanit ingerlanneqartut Kalaallit Nunaanni inuussutissarsiornermut pingaaruteqarluinnarput, immikkut



illoqarfinni mikinerusuni. Meerartaarnermi suliffeqarfik unitsinneqartariaqassappat tamanna suliffeqarfiup ingerlaqqinnissaanut navianartorsiortitsisinnaavoq. Taamaattumik siunnersuut inuussutissarsiortut suliffeqarfimminnik attassiinnarnissaannut iluaqutaassaaq.

Siunnersuut ilaqutariinnut aamma pingaaruteqartuuvoq, tassami angajoqqaat meeqqaminnut piffissaqarnissaat aammalu meeqqartaarnermi toqqissisimanartumik atugaqarnissaat pitsaanerulersinneqassaaq. Atassutip isiginnittaasiani pingaaruteqartarpoq inuiaqatigiinni innuttaasut periarfissinneqarnissaat namminneq inuunerminnik aqqissuussisinnaanissaannut. Taamaattumik siunnersuut inuiaqatigiinni inuussutissarsiortut ilaqutariillu pitsaanerusumik atugaqarnissaat anguniarlugu isigineqarsinnaavoq.

Taama oqaaseqarluta siunnersuut ilalerparput. Inuussutissarsiornermut Aatsitassanullu ataatsimiititaliami innersuupparput.